

文

山

集

文

山

集

宋丞相文山先生全集卷之四

啓

回李安撫肯齋

叨臬湘南余征上日樞衣洛下伊邇中台亟裁書而叙心  
將考德而問業恭惟某官名門人傑昭代吏師醴泉芝草  
麒麟天生瑞質高山深林龍虎代出魁人見謂西珍蔚爲  
南望自覽德翔千仞而下即回瀾障百川之東粉牆紫界  
之踳躐玉檻丹梯之凌厲連麾江海風馳五袴之聲疊節  
荆吳星度六絲之影以天下而自任何王事之獨勞迨授  
鉞於千畿乃進書於九扈俄動平地神仙之想來尋往時



鍾鼓之盟湘水春深未許放情於黃老虞廷日永行看翔  
舞於夔龍某飲菊悠然夢蕉儻爾起家乘傳念舊綉之波  
濤畏道回車想綠簑之風雨幸近十洲之島冀沾九里之  
河滕壤舊廬曾識平反之譜周原新轡願承鞭辟之方拜  
下非遙由中莫既

回前人賀遷秩

影縻下隰奚補毫釐步進員階忽饒分寸未謝玉淵之潤  
先厓金薤之華自笑竿魚爲官何拓落也尚隨書鶴振德  
而輔翼之未悉刊酌餘啗嗣布

送前人冬

灰管移新律暖轉蒹葭鍾鼓樂清時春生花竹隔幔綈之  
醲郁阻履韞之從容薄注鄴清式歌魯瑞俯慚雲繡又添  
愛日之紋隄聽雷鼉趣侍含光之宴微芹馳瀆采非知榮

賀前人冬

黃鍾噓暖繡線紀長錦堂增履韞之春綠野換荔芸之色  
某謾馳今雨阻造下風隄睇翠蓬莫遂前茅之拜第瞻鶴  
燄早催元會之朝

餽前人歲

朱泥貼歲驚殘爆竹之寒綠野回春喚起屠蘇之曉欲贊  
喧馬散鴉之集曾微橫鯉卧兔之供柏葉浮香隄想午橋

之宴梅花轉暖即迎卯詔之來輜瀆包羞麾留爲寵

賀前人正

攝提貞孟瓿春回甲胄祝融接天柱雲度午橋元氣與游  
壽祺來介某官泰內君子西方美人樂鐘鼓於園林聲和  
綠淨拜衣冠於闔闔光近清都表新渥於鶴書催窮班於  
鰲禁某迹縻俗駕心遙賀床星遙指於軫中拳拳公壽雪  
立殘於門外耿耿予懷

送前人元宵

火樹銀花簇朱陵之明月羅幃綉幙開綠野之春風莫陪  
鐘鼓之勝遊敬效豆籩之攝飲醉長沙行湘水忍賦岸花

遶建章立通明佇依雲朶區區輶瀆眈眈麾留

賀前人納子婦

歡聲噪鵲喜氣乘龍日耀屏金春生堂錦伏惟歡抃某永  
塵賀履敢後慶箋猥此將芹菲然采若倘蒙鑒茹無任欣榮

送前人別會

楚節易麾有味林鳥之哺湘花舞席踰瞻湖鴈之飛感水  
薤之風規持金蕉而兩別日暮碧雲含耿河漢之相忘月  
明今宵多勞江湖之遠夢薄言折寄微惠麾留

廣西李經略經過迎狀

圭裳東覲牙纛西來畫鷁鏡秋懸桂林之明月綉屏帳晚

拂石廩之行雲雷馭先驅天吳起舞某摩挲脫履飛遶前  
茅逐東野之龍久懷上下拜北平之馬重覩傑魁

請廣帥會

傳鼓上清湘桂舟度曉舉杯邀明月楚觀生秋輒扳千乘  
之光華重話六年之契闊舳龍飛動豈敢爲從者之淹檣  
燕慙慙且爲盡故人之飲

折送諸監司巡歷會

問楚囚而返棹幸接席間傳鄴錄以稱觴幾成瓦後欲游  
邀於金轡恐重溷於冰壺獻芹而效野人顏之厚矣折枝  
以奉長者禮亦宜之區區卷俎不腆僭易馳獻如沐肯留

萬有餘榮

回朱帥參

疇庸紅旆贊畫油幢羅帶玉簪卷嶺麾之雲氣銀濤青壁  
籌湘柳之春風五朶施先七襄禮後某官春容之度瞻蔚  
之文颺起雷轟揭修名於千佛霜懸雪跨歛神氣於九仙  
弓矛洛下之耆英領袖湖南之賓客月暗秋城燈明夜觀  
日臨仙掌烟傍袞龍小駐籌帷促歸輦路某居慚未見切  
幸寅同訪赤字於山尖喜陪新雨望冰壺於幕下諭結飛  
霞繾綣情深敷茶詞約

回劉運管志叔

文山全集 卷之四  
周隰馳駟恍波濤之移綉祁山流馬催帷幄之運籌一介  
施先七襄報後某官鞭駕英雄之意氣攢吸霞雨之文章  
雲杏露桃艷神仙於蓬島燈碁月柝重賓客於湖南小泛  
紅蓮佇歸青瑣某俯慚小草仰辱儷花逢故人於瀟湘尚  
珍金玉跂天孫於雲漢莫報襜褕

回葉茶場

車來今雨載征濡轡之塵旗展春山遠聽杖藜之句感君  
雙尺華我六絲捧雲漢之織裳莫將瑤報撫波濤之舊綉  
尚藉填規

賀桂陽劉守

疏綸鰲掖作鎮熊湘天上仙班猶帶觚稜之月湖南道院  
新行啓戟之春條貫昭蘇毫倪驩舞恭惟某官真霄漢士  
爲文章翁袖五老之風烟挿天秀色卷三神之霧雨搏海  
壯畧自騰翔殿角之雲已錯落班心之玉飽看芙蓉之輝  
媚尋歸芍藥之從容記太史之名山金匱石室籌將軍之  
武庫紫電清霜小橫桂水之烟歡戲萊衣之綵樂騏驥道  
夫路雷動先聲驅蛇龍放之菹春生敏手襦歌鼎鼎綈召  
堂堂某息蔭載騏叨恩便養東馳西騫迹將遠於江湖夜  
醉曉行心相望於霄漢輪囷抒謝藁枯包羞

賀寶慶王守

丹詔起家彤幃就國跨茅山鶴來從勾曲之洞天分竹使  
符出領濂溪之霽月感先未識樂在寅同恭惟某官鴈蕩  
孤峯梅溪的派激龍湫而和妙墨箋古史倚相之書執牛  
耳而主齊盟負大學何蕃之望大車九軌砥柱百川峩峩  
天上之神仙佩蒼鳴曉纚纚水邊之花氣戟畫闌春風行  
蘭國之江山燠轉梅峰之草木銀菟出色畫鹿生光川暖  
玻瓈小駐插天之紅旆花深翡翠佇馳度漢之紫泥某舊  
綉醜顏新麾照眼九州地接獨先鄰燭之光一水江連飽  
聽今孺之頌衷旌摇曳舌筆單踈

賀道州王守

鳳撿揚庭熊旂赴鎮翩翩趙公子星煥九霄粲粲元道州  
風行千里騷蘭香度童竹歡傳恭惟某官簫鐘瑤簫之音  
金井玉輪之操當家清白撫千佛之青瑣上界葱蒼接九  
仙之玉佩出則躔躔於湖海入而黼黻於周行衣冠照湏  
女之珠樽俎總從戎之析卷紫電清霜之氣主光風霽月  
之盟驅龍蛇放之菹春生敏手桀騏驎當夫道雷動驩聲  
發游刃於新硎走神丸於迅坂民歌來暮公快行春香戟  
凝清和墨剡吟於碧落璽書照渥追鋒促覲於紅雲某鼂  
技已窮壯驅何補九州襟帶喜親鄰燭之輝萬井旌旗滿  
聽今襦之頌溶溶新雨疊疊下風

賀永州袁守交割

春生騎竹吉耀菟銀揚照軫之旌旗布先庚之條貫風行  
千里庭迅三吾某喜滌籀之辰良即盍簪而申慶亟馳泓  
穎預訊轅和

回前人

懷紱湘源榮分半竹飛書楚觀光挹前茅爲華綠淨之江  
山猶帶紫清之烟霧沸歡聲於稚穉浮喜氣於寒蕓瞻鸞  
鵠於北平趫然擊節爲雲龍於東野喜甚執鞭橐結占酌  
輪囷覲謝

請雷州虞守

領紱海邦低簪楚觀太史紬金石契闊十年故人逢瀟湘  
會并一日喜來今雨願欸清風

送前人別禮

剪燭空涼喜話巴山之雨解維浩渺莫追溟海之風  
傳鼓之麾呵曷究執祛之繾綣折梅花於峒嶺愧我騷騷  
隨雲氣於蓬萊爲君娓娓

回諸郡守冬

陽氣應黃鍾時哉南至兵衛森畫戟祝我東風昭黼黻於  
魯臺噓塵埃於楚觀恭惟某官陽明人物雷動聲名麗曉  
旌旗照映壺冰之潔行春鼓角發舒圭影之和近七日之

朋來進三朝之元會某坐馳梅影踰借芸香官線添長正  
覲顏於把綉雲門入奏惟洗耳於歌襦

回諸郡送年酒

開荆楚之畫鷄舊梅如夢賦蘇州之清燕新麴生香挹宮  
錦之淋漓醉屠蘇之先後從太守樂知同元日之春爲細  
民斟願廣東風之賜

回諸郡賀年

條風開獻節雄律鳴春戟衛森清香雌堂麗曉茨梁介祉  
草木生輝恭惟某官氣度陽明精神雷動玉珂舊影光搖  
白獸之尊皂蓋清塵彩照蒼龍之角小聽歌襦之暖即來

召綽之溫某坐閱一期踰瞻五馬回車雲近方懷邛坂之  
思化犢日長尚味海瀕之譜

送徐權府折俎

舟泝鴈回載沐瀟湘之雨雲連燕寢渴陪桃李之春恐廢  
聽棠薄言羞藻乞爲寒水玉恨莫對於冰清走置錦屠蘇  
敢坐將於鄴渌

回前人請宴折俎

帆浦乍歸沐東風之飛錦鈴齋相望荷北海之開樽清來  
畫戟之香綠折瓊芝之草碧甯隄卷如坐使君之林玉案  
無酹有愧美人之綉